

Caiqraen Bi 2023, Mwngz Ndei Bi 2024

□ Cinz Lisinh / 覃丽新

“Dang dang dang……” Sing cung coux moq byonghhwnz yiengj lo, sing daih’ it, sing daihngeih, sing daihsam…… Doengh gij saeh gvendaengz bi 2023 cungj bienqbaenz doenghbaez lo.

Lumj dwg baez mbat lwgfwngz, ci’ndaen lezceh seizgan couh ringx haeuj bi 2024, bi 2023 couh baenz doenghbaez. Aen lezceh seizgan youh dap raeuz bae aen camh moq bailhaj——bi 2024. Vadvad fwngz, bi 2023 couh yied bae yied gya; mbehai song gen, bi 2024 couh got haeuj ndaw rungj. Ndwenggoenz dwg ceiq moq, gizhaidin hix dwg ceiq moq, youq bimoq yaek hwnjdin, yienghlawz cungj mbouj rox baenzlawz, bouxlawz hix mbouj rox yaek gvaq ndaej yienghlawz, mbouj simvueng mbouj da laep, gvaq ndwenggoenz baenz cihgeij siengj aeu gvaq haenx, gvaq baenz aen yiengh cihgeij ceiq gyaenz haenx, ngoenzlaeng miz maqmuengh.

Dauqngex seiz doenghbaez lij oi, “nienz oi mbouj rox you, nyengh mbouj maij doegsaw. Ngoenzngoenz gvaq ngoenz byouq, fanh saeh guh mbouj baenz.” Moix ngoenz gvaq ndaej simfouz youh simcit, ngoenz doek ngoenz dauq, ndwen gvaq ndwen, caenh rox yawj daengngoenz hwnj youh doek, ronghndwen rongh youh ndaep, yiengh ndeu cungj guh mbouj ndaej baenz. Seizneix vunz daengz cungnienz, gwnz miz bohmei lauxgeq aeu ciengx, laj miz lwgnding iqt aeu rungx, moix ngoenz lij miz gij hong nyaengqnyat aeu guh, yienghyiengh cungj lumj goengq byasang nei, at ndaej vunz hwet gungj nanz diemheiq. Ndigah seiz fangzhwnz cungj siengj dauq daengz seiz lwgnyez, gvaq cungj ndwenggoenz mbouj you mbouj ngeix: Dungx iek hozhat, miz gij gwn rangfwd daxmeh cawj youq ndaw rek; naetnaiq raninz, miz mbaq bohmei giengeng daeuj ai. Miz haujlai seiz naetnaiq le, gou cungj laihaenz cihgeij lij dwg dahmbwk diuqyetyet youq ndaw gyanghongh,

henz ndang miz gyoengq nyezdoh guh’ angq gyaep bae gyaep dauq, lij miz daxbuz cingq unqswnh gangj gojgaeq hawj gou, bohmei gaengguh mbouj faen hwnzngoenz nyaengq bae nyaengq dauq. Hoeng naetnaiq baez gvaq, gij laihaenz couh lumjaen fugfauz ndongqlik youh ronghrib cingq mbin youq laj ndit, baez bungq couh bauq le siusaet bae lo. Gou rox, ndwenggoenz mbouj dwg gojlgnyez, baenzlawz cungj aeu bae najdoi q gij yienhsaed yaemcit.

Mizseiz hix cungj nyinhnaenz dwgriu, seiz lij iq dwg lwgnyez, sim cungj siengj vaiqdi majhung, cungj laihaenz: Majhung le mbouj yungh gaujsi, hix mbouj yungh raiz cozyez, baenzbaenz cungj miz hong guh ra ndaej cien; majhung le cihgeij siengj bae guh maz couh bae guh maz, siengj baenzlawz gvaq ndwenggoenz couh baenzlawz gvaq; majhung le couh gag miz gij bonjsaeh hwnj mbwn roengz namh, neix mbouj dwg gig ndei ha! Hoeng caencingq majhung le cij fatyienh ndwenggoenz dwg baenzneix fouzcingz fouznaih, de couh lumj cik fwngzfangz hungmbwk caemhcai q yawj mbouj raen ndeu, rag mwngz diuq hwnj diuq roengz, saet bae saet dauq. Seiz iq ndaej naed diengzvan couh lumjnaenz cihgeij gaengq miz gij doenghyiengh gwnzbiengz ceiq ndei, caenh riuhaha sim’angq dangqmaz, seizneix gaengq mbouj roxnyinh gij sim’angq genjdanh seizhaenz dwg baenzlawz yiengh lo. Gij sim’angq doenghbaez, seizneix hix riengz bi ra mbouj ndaej doxdauq lo. Seiz iq gaengq gvaqbae, gwnzbiengz gaengq bienqvaq!

Seizgan fouzcingz, yaep da couh gvaqbae lo. Raeuz baez byaij yamq he cungj ndaej yawjraen gij gingisaek mbouj doxdoengz. Doeg le haujlai saw ndei, swhsiengj cihgeij menhmenh ndaej daezsang lo. Youq ndaw gij ndwenggoenz hoenghhub neix, gou hag rox caemdingh aen sim, mbouj caiq fat maxlaz, engq mbouj caiq gamj dawz cihgeij beij baenz duzbid, ndoj le sam bi cij vih aen seizhah ndeu. Gou cij rox aeu dawz aen sim cihgeij baij cingq, sim cuengq gvangq, da yawj ndaej hailangh, roengzrengz gaengguh, aiq ndaej gvaq ndwenggoenz ndaej baenz aen yiengh cihgeij siengj gvaq haenx. Bi 2023, doegsaw, sij cih, ndaem byaek ndaem va, ginggoj dajging, ra youx lauh haw…… Seiz guh

hong couh guh hong, seiz ndaejhoengq couh cuengqsoeng cihgeij bae caemz, siengj guh maz couh guh maz. Gou nyinhnaenz: Dauqdaej gij gyaendei ndaw biengz lij miz haujlai hawj vunz sim siengj sim muengh, sim’angq simcuk ne.

Dauqyawj bi 2023, mizseiz mbouj swnh, mizseiz siengsim, hix miz simhai sim’angq. Hoeng cijaeu cihgeij haengrengz guh, netsim caux, hix ndaej mbouj vueng mbouj muengz byaij gvaqbae, mbouj lau mbouj suk, haengrengz bongj raemxlangh baenaj, nyangz oen couh yunghrengz baet, raen gumz laeg couh dienz. Gij ndwenggoenz gvaqbae haenx, dauqngex hwnjdaej aeu rox lumz bae simnyap simyou, insik duenh seiz simhai sim’angq, cingsaenz couh seizseiz cuncuk, neix couhdwg gij souhaej cihgeij caenhrengz bae buekguh, dwg faenh dapgienj ceiq muenxeiq ndwenggoenz bingzciengz.

Seizneix, gaengq dwg bi 2024, soengz youq seiz biek gaeuq coux moq, gou simlangh fanfoed, diuz roen seiqvunz miz haujlai nanz haujlai yiemj, cijaeu riunyumnyum bae najdoi q, couhsuenq gamz dawz raemxda ndawsim hix ndaej hai ok dujva singisien.

Seiqvunz bouxlawz cungj dwg soemj manh haemz hoj hamz haj cungj feih rangh hwnjdaej, danghnaenz siuj le cungj feih lawz, ndwenggoenz couh caen mbouj miz feihdauh lo. Geiq ndaej miz coenz vah ndeu gangj: Gij haemz mwngz gwn gvaq, gij naiq mwngz souh gvaq, cungj miz ngoenz ndaej bienqbaenz gij rongh ciuq gij roen mwngz ngoenzlaeng byaij baenaj haenx. Ndigah seizneix mwngz naemj maz, seizneix mwngz guh maz, di neix di haenx doxlien hwnjdaej couhdwg gij ndwenggoenz hajsak, dwg gij ginglig seiqvunz mbouj ndaej siuj. Ginglig seiqvunz miz geijlai na, miz geijlai gvangq, cungj dwg youz mwngz cihgeij daej gietdingh. Moix cungj feihdauh cungj wnggai ndaej insik, cungj hawj vunz nanzlumz.

Bi 2024, vih nyangzraen cihgeij engq gyaendei, goj lai doegsaw, lai lienhdang, lai riunyumj, siuj di simnyap, noix di ngeizvaeg, gvaq ndwenggoenz baenz cungj yiengh cihgeij siengj aeu gvaq de, mbeihung bongh coh naj, mboujguenj gij roen baihnaj dwg daihloh roxnaenz roennou, hix mboujguenj gwnz roen dwg hai doh vamoq roxnaenz maj rim goen.

Gij simyou simnyap cungj ce youq bi 2023, aeu simhai sim’angq daej coux bi 2024. Bi 2023 caiqraen, bi 2024 mwngz ndei!